

BOSNA I HERCEGOVINA
FEDERACIJA BOSNE I HERCEGOVINE
ZENIČKO DOBOJSKI KANTON
OPĆINSKI SUD U VISOKOM
Broj: 41 0 K 095279 23 K
Visoko, 11.04.2023. godine

U IME FEDERACIJE BOSNE I HERCEGOVINE!

Općinski sud u Visokom, sudija pojedinac H.H.-F., uz sudjelovanje zapisničara E.B., u krivičnom predmetu protiv optuženog G.A., zbog krivičnog djela Nasilje u porodici iz člana 222. stav 2. u vezi sa stavom 1. KZ F BiH, postupajući po optužnici Kantonalnog tužilaštva Zenica broj T04 0 KT 0050856 22 od 17.11.2022.godine, nakon održanog javnog glavnog pretresa dana 11.04.2023. godine, u prisutnosti tužioca Kantonalnog tužilaštva Zaničko-dobojskog kantona L.H.-S. i optuženog, na osnovu člana 300. Zakona o krivičnom postupku Federacije Bosne i Hercegovine (ZKP F BiH), dana 11.04.2023. godine donio je i javno objavio:

PRESUDU

Optuženi: G.A., sin P. i majke H. rođene H., rođen godine u mjestu G., općina O., gdje je i nastanjen na adresi G. bb, pismen, sa završenom srednjom školom-građevinska, nezaposlen, po zanimanju radnik, razveden, otac dvoje djece, vojsku služio, vodi se u vojnoj evidenciji u O., lošeg imovnog stanja, po narodnosti, državljanin BiH, JMB:, neosuđivan,

K R I V J E

Što je: dana 18.10.2022. godine, oko 22,30 sati, na području općine O., u kući u kojoj živi u zajedničkom domaćinstvu sa svojim roditeljima, a koja se nalazi u mjestu G., vršio psihičko i fizičko nasilje prema svom ocu G.P., rođen 17.07.1941. godine, na način da je nakon što se doveo u alkoholisano stanje, kada mu je otac rekao da ne pravi buku i da hoće da spava jer je star i bolestan, istom počeo psovati majku i prijetio da će ga zaklati, te fizički nasrnuo na oca zadavši mu udarce rukama u predjelu leđa, iako je znao i bio svjestan da takvim postupanjem može ugroziti mir, psihičko i fizičko zdravlje člana svoje porodice, što je i htio, a potom počeo bacati stvari iz kuće kroz prozor, nakon čega je otac pozvao svog drugog sina H., koji je nazvao policiju, a osumnjičeni pobjegao iz kuće, na koji način je ugrozio mir, tjelesnu cjelovitost i psihičko zdravlje svog oca,

Dakle, nasiljem i drskim ponašanjem ugrozio mir i psihičko zdravlje člana svoje porodice sa kojim živi u zajedničkom kućanstvu,

Čime je učinio krivično djelo Nasilje u porodici iz člana 222. stav 2. u vezi sa stavom 1. KZ F BiH.

Pa sud optuženom G.A.u za krivično djelo Nasilje u porodici iz člana 222. stav 2. u vezi sa stavom 1. KZ F BiH, primjenom odredbi člana 6.,7.,60., i 62. KZ F BIH, izriče:

USLOVNU OSUDU

kojom se optuženom za počinjeno krivično djelo utvrđuje kazna zatvora u trajanju od 6/šest/ mjeseci i istovremeno se određuje da se ista neće izvršiti ukoliko u roku od 1/jedne/godine od dana pravosnažnosti presude ne počini novo krivično djelo.

Na osnovu čl.202 st.4 ZKP FBiH, optuženi se oslobađa plaćanja troškova krivičnog postupka, pa isti padaju na teret sredstava suda.

Na osnovu člana 212. stav 3. KZ F BiH oštećeni se sa imovinsko pravnim zahtjevom upućuje na parnični postupak.

Obrazloženje

Kantonalno tužilaštvo Zaničko-dobojskog kantona je optužnicom broj: T04 0 KT 0050856 22 od 17.11.2022.godine, optužilo G.A.a, da je radnjama u optužnici počinio krivično djelo Nasilje u porodici iz člana 222. stav 2. u vezi sa stavom 1. KZ F BiH. Optužnica je potvrđena odlukom sudije za prethodno saslušanje dana 21.11.2022. godine, te nakon što se optuženi izjasnio da nije kriv po predmetnoj optužnici spis je dostavljen drugom sudiji radi zakazivanja glavnog pretresa.

Glavni pretres je otvoren dana 11.04.2023. godine čitanjem optužnice. U uvodnim riječima tužilaštvo ističe da će provesti dokaze kako je navedeno u optužnici, ispitat predložene svjedoke, uložiti materijalne dokaze a po potrebi provest će i druge dokaze.

Optuženi u uvodnim riječima navodi da priznaje da je to uradio, jer je bio u alkoholiziranom stanju, žao mu je oca, kaje se, izvinio se ocu, obećava da to nikada neće ponoviti, sramota ga je, ne konzumira alkohol već 6 mjeseci, cilj mu je da više nikad ne konzumira.

Kako optuženi u svom uvodnom izlaganju u potpunosti, svjestan pšosljedica priznanja izjavu da priznaje izvršenje krivičnog djela opisano optužnicom broj: T04 0 KT 0050856 22 od 17.11.2022.godine, to je sud otpustio svjedoke koji su pristupili na glavni pretres, G.H. i G.P., te nastavi osa izvođenjem materijalnih dokaza.

U toku glavnog pretresa izvedeni su dokazi uvidom i čitanjem u Zapisnik o ispitivanju osumnjičenog G.A. PS O. broj: 08-02-12/1-238/22 od 21.10.2022. godine, Zapisnik o saslušanju svjedoka-oštećenog G.P. PS O.. broj: 08-02-12/1-235/22 od 19.10.2022. godine, Zapisnik o saslušanju svjedoka G.H. PS O.. broj: 08-02-12/1-234/22 od 19.10.2022. godine, Rješenje Općinskog suda u Visokom-Odjeljenje u O. broj: 41 0 Pr 011315 22 Pr od 19.10.2022. godine, alkotest-print broj: A418057 na ime G.A., Izvod iz kaznene evidencije-obavijest za osumnjičenog G.A., PS O. od 14.11.2022. godine (prilog: fco. 29 kaznenih listova na njemačkom jeziku).

Optužba nije imala dokaznih prijedloga niti je prigovarala izvedenim dokazima.

U završnim riječima optužba ističe da obzirom da je optuženi u cjelosti priznao učinjenje krivičnog djela i da je priznanje optuženog potkrijepljeno i u saglasnosti sa svim dokazima iz optužnice, predlažu da ga sud oglasi krivim i izrekne kriv.ppravnu

sankciju u skladu sa zakonom sa uvažavanjem svih okolnosti koji utiču na vrstu i visinu iste.

Optuženi u završnim riječima izjavi da se to neće nikada više ponoviti, živi sa ocem i brine o njemu, kao i o majci koja je dijabetičar, žao mu je što se to desilo, kaje se, ne konzumira više alkohol i moli sud da ga oslobodi troškova obzirom da je lošeg imovnog stanja.

Nakon ocjene svakog dokaza pojedinačno i u njihovoj međusobnoj povezanosti, sud je utvrdio da je optuženi G.A. radnjama opisanim u izreci presude, počinio krivično djelo Nasilje u porodici iz člana 222. stav 2. u vezi sa stavom 1. KZ F BiH.

Na glavnom pretresu dana 11.04.2023. godine su izvedeni dokazi Zapisnik o saslušanju svjedoka-oštećenog G.P. PS O. broj: 08-02-12/1-235/22 od 19.10.2022. godine, Zapisnik o saslušanju svjedoka G.H. PS O. broj: 08-02-12/1-234/22 od 19.10.2022. godine, proizilazi da je optuženi dana 18.10.2022. godine, oko 22,30 sati, na području općine O., u kući u kojoj živi u zajedničkom domaćinstvu sa svojim roditeljima, a koja se nalazi u mjestu G., vršio psihičko i fizičko nasilje prema svom ocu G.P., rođen godine, na način da je nakon što se doveo u alkoholisano stanje (koju činjenicu potvrđuje dokaz uvidom i čitanjem u alkotest-print broj: A418057 na ime G.A.), kada mu je otac rekao da ne pravi buku i da hoće da spava jer je star i bolestan, istom počeo psovati majku i prijetio da će ga zaklati, te fizički nasrnuo na oca zadavši mu udarce rukama u predjelu leđa, iako je znao i bio svjestan da takvim postupanjem može ugroziti mir, psihičko i fizičko zdravlje člana svoje porodice, što je i htio, a potom počeo bacati stvari iz kuće kroz prozor, nakon čega je otac pozvao svog drugog sina H., koji je nazvao policiju, a osumnjičeni pobjegao iz kuće, na koji način je ugrozio mir, tjelesnu cjelovitost i psihičko zdravlje svog oca,

Svi izvedeni dokazi su u potpunosti saglasni, jasni, poklapaju se u bitnim dijelovima i dosljedni priznanju optuženog, čine međusobno jedan zatvoreni krug i dovode do istog zaključka kako je to sud izrekao u ovoj presudi.

Sud zaključuje da je optuženi navedeno krivično djelo počinio sa direktnim umišljajem, jer je bio svjestan svog djela i htio njegovo izvršenje, a sud u toku postupka nije posumnjao da na strani optuženog postoje okolnosti koje bi dovele u pitanje uračunljivost optuženog, jer iz predočenih dokaza ne proizilazi sumnja da optuženi nije bio u mogućnosti da shvati značaj svojih djela i da upravlja svojim postupcima u vrijeme izvršenja djela.

Stoga ga je sud za navedeno krivično djelo oglosio krivim i kaznio.

Prilikom odmjeravanja krivičnopravne sankcije, sud je imao u vidu osnovne kriterije, a to su granice kazne propisane za predmetna krivična djela, za krivično djelo Nasilje u porodici iz člana 222. stav 2. u vezi sa stavom 1. KZ F BiH propisana je novčana kazna ili kazna zatvora do tri godine, te okolnosti koje karakterišu počinjeno krivično djelo i učinioca (olakšavajuće i otežavajuće okolnosti), i to: stepen krivice, pobude iz kojih je djelo učinjeno, jačina ugrožavanja ili povrede zaštićenog dobra, okolnosti pod kojima je djelo učinjeno, raniji život učinioca, njegove osobne prilike i njegovo držanje nakon učinjenog krivičnog djela, kao i druge okolnosti koje se odnose na učinioca (iz člana 49. KZFBiH).

Od olakšavajućih okolnosti sud je cijenio korektno držanje optuženog tokom krivičnog postupka, da je priznao izvršenje radnji opisanih u optužnici, što je doprinijelo ekonomičnosti krivičnog postupka, da se radi o licu koje je nezaposleno, otac dvoje djece, razveden, lošeg imovnog stanja.

Kao otežavajuću okolnost sud nije mogao cijeniti raniju osuđivanost optuženog jer su u spis suda uloženi isključivo izvodi iz evidencija na njemačkom jeziku, a kako sud nije dužan da po službenoj sužnosti vrši prevod dokaza koje stranke predlažu i izvode to sud nije ni cijenio ove dokaze.

Uvidom u izvod iz kaznene evidencije broj 08-02-12/1-03-10-11-4048/22 od 14.11.2022. godine sud je utvrdio da lice G.A., sin P., rođen godine u Općini O. ne prolazi kroz kaznenu evidenciju PU V PS O., dok su u periodu od 2010. godine do 2022. godine zaprimili 22 kaznena lista za imenovanog od strane države Nj., a koji nisu prevedeni na Bosanski jezik.

Nakon ocjene navedenih okolnosti, uzimajući u obzir sve okolnosti, težinu konkretnog krivičnog djela, sud je optuženom utvrdio za krivično djelo Nasilje u porodici iz člana 222. stav 2. u vezi sa stavom 1. KZ F BiH kaznu zatvora u trajanju od 6 (šest) mjeseci, koja kazna se neće izvršiti ukoliko optuženi u roku od 1/jedne/godine od dana pravomoćnosti ove presude ne počini novo krivično djelo. Utvrđena kazna je bliže minimumu propisane kazne za navedeno krivično djelo, a vrijeme provjeravanja 1/jedna/ godina, jer sud smatra da je to optimalno vrijeme za provjeru uticaja ove vrste sankcije na optuženog i činjenje krivičnih djela.

Sve prednje navedeno ovom sudu je pokazatelj da se u konkretnom treba primjeniti odredba člana 62. stav 2. KZ F BiH i optuženom izreći blaža sankcija, odnosno da u konkretnom slučaju nije neophodno izvršenje kazne radi krivičnopravne zaštite, nego da je dovoljno upozorenje uz prijetnju utvrđenom kaznom zatvora. Sud nadalje ističe da ukoliko optuženi u periodu provjeravanja počini novo krivično djelo, Sud može opozvati uvjetnu osudu u skladu sa odredbom člana 64. KZ F BiH i optuženom izreći utvrđenu kaznu prema pravilima predviđenim u članu 64. stav 2. KZ F BiH.

Na osnovu člana 212. stav 3. ZKP BiH oštećeni se sa imovinsko pravim zahtjevom upućuje na parnični postupak, jer podaci krivičnog postupka ne pružaju pouzdan osnov ni za potpuno ni za djelimično presuđenje.

Na osnovu člana 202. stav 4. Zakona o krivičnom postupku Federacije Bosne i Hercegovine (ZKP F BiH) u vezi sa članom 204. ZKP F BiH optuženi se oslobađa dužnosti da naknadi troškove postupka, te isti padaju na teret budžetskih sredstava. Naime, tokom postupka je utvrđeno da je optuženi nezaposlen, te da je lošeg imovnog stanja pa je sud smatrao da bi obavezivanjem na naknadu troškova bila ugrožena njegova egzistencija, iz kojeg razloga je donio odluku kao u izreci.

ZAPISNIČAR
E.B.

S U D I J A
H.H.-F.

POUKA O PRAVNOM LIJEKU: Protiv ove presude je dozvoljena žalba Kantonalnom sudu u Zenici, koja se podnosi putem ovog suda u roku od 15 dana od dana prijema pismenog otpravka presude. Žalba se podnosi u dovoljnom broju primjeraka za sud i stranke.